

辟
雍
紀
事

神宗

辟雍紀事十三癸酉至庚申凡四十八年泰昌元年附

萬曆祭酉元年二月改南祭酒林士章爲北祭酒命

南禮部侍郎萬士和掌南監事和字思節宜興人

嘉靖辛丑進士公自少類異成進士讀中秘書忤

分宜出爲禮部主事歷官藩臬至戶部右侍郎復

以忤相去後再起南禮部侍郎至是掌監篆未幾

入爲大宗伯再忤江陵遂乞歸通籍五十年而家

食者過半大都不合時相也性極孝友尤堪師表

蔡倫○五月禮部奏廷試過恩貢生分撥兩雍肆

業○十月北祭酒林士章以貢數倍增撥歷缺少
將請歷事監生遞減三月則減三名可增一名之
缺亦疏通歷法之一端也吏部覆奏行之○是月
議先臣新建伯王守仁從祀進士鄒德涵獨疏謂
守仁倡道明理有功後學宜照薛瑄一體從祀報
可○十二月陞南祭酒禮部侍郎萬士和爲禮部
尚書陞太常少卿姚洪謨代之謨字繼文秀水人
嘉靖癸丑進士以編修改湖廣提學副使陞常少

○甲戌二年二月給事中劉鉉奏監生常課外宜講

讀律令下其議所司○四月詔南掌院余有丁爲
南祭酒因洪謨未任請告故也有丁到任手歷史
漢暨齊梁等史更鐫之課士不以浮華一時士習
爲變丙寅引疾歸後再起視北雍事尋陞禮部右
侍郎入內閣終于長安邸第上震悼賻賜備物
祭葬有加謚文敏○陞南學正張遂爲南戶部主
事遂漢陽人舉于鄉與江陵同籍公善談名理耿
恭簡亟稱之遂相友善因與近溪見羅諸先輩游
孫桐城論遷南學正時江陵起復道南都謂遂曰

隨年兄所欲得官當卽以相除遂斃然曰豈有以
朝廷官爵爲相公作人情者乎拂衣竟去滿考僅
得戶曹家赤貧常盛寒衣單薄耿恭簡見之惻然
因解已敝貂衣衣之甫衣之野見山舍翁有寒栗
狀輒解以衣翁鄒四山嘗贈以詩曰憐貧骨可分
蓋其天性然也公位不尊而以斯文爲已任引掖
後進尤孜孜如不及云

○乙亥三年正月吏科歐陽栢獻議一欲均南北學
職之選一欲重大臣錄後之恩報聞○國子監奏

勳臣貴戚子弟宜盡數送監教習

上從之○十月北祭酒孫應鰲乞哀習英才以弘教
育要行天下下第舉人督送入監違者不准會試
制曰可○司業周子義考滿復職

○丙子四年正月巡按御史邵陞薦原任禮部尚書
前祭酒陸樹聲○二月禮科給事中孫訓申飭條
約內天下第舉人已入監者方許就教勸戚子弟
年十四以上者俱令送監讀書未入監者不許承
襲從之○四月掌監事禮部侍郎孫應鰲奏

祖宗設立太學非舉貢暨勳胄恩蔭不許濫入自事例
一開廩增附不已遂濫及青衣發社及斥退者豈
太學爲不才之逋逃藪與至民間俊秀大半富商
大賈之兒蕩子頑童但入微貲皆占成均之籍夫
郡縣之士必試以經術始入黌宮今身未成童目
不識丁者皆可驟躡賢關是虎闌重地反不如黨
庠術序之有選擇也伏冀敕下戶部詳議如果經
費大匱停廩停增降附者暫許充納此外一切罷
之疏聞下部議戶部如數覆之報可○十月南祭

酒余有丁稱舊疾弗瘳不能供職予告歸田尋起
陞禮部右侍郎○起原任南祭酒姚洪謨改北祭
酒以南禮部侍郎改邁掌南祭酒事邁字時訓南
京留守衛人嘉靖辛丑進士歷任南吏部及藩臬
陞太僕卿起南太常陞禮侍次年乞休

○丁丑五年三月查取下第舉人李繼桂等三千四
百三十九名分送兩監讀書○南禮科彭應時奏
幼掌監事殷邁衰老不堪師表且溺志異端應罷
部覆休致

上不允○吏部奏國子博士等官一體考選 詔從

之○四月命北祭酒姚洪謨充經筵講官○南祭

酒殷邁三上疏求罷乃放歸命南太常卿屠羲英

代掌監事羲英字淳卿寧國人嘉靖丙辰進士歷

官戶部藩臬陞太僕少卿轉南太常卿英與邁先

後掌監俱不以詞林起家○時邁甫罷有監生茅

迪吉沈德謙等笞辱其僕綱之深室榜掠無算司

業周子義命典籍持牌曉諭拒不得入監丞親往

問諭乃得救解南科道合疏糾叅都御史林有誥

亦有疏 上可其奏逮茅廸吉等問如律乃論國
子監申飭監規一遵 祖宗之法遵雖有異端
之弊然實清修恬澹士大夫雅重之而獨不禮於
士亦一奇也華亭陸平臺宗伯常謂邁生鎮雅俗
似房次律急流勇退似錢宣靖洞明宗旨則楊次
公是太傅至其信道之篤不言躬行理學諸儒未
之或過人以爲知言○十二月改司業周子義于
北以侍讀張位代之位字明成新建人隆慶戊辰
進士

○戊寅六年正月南祭酒屠羲英再疏乞休疏下部覆而南給事王蔚復出疏抨之矣疏中因極論援納之弊宜如前祭酒孫應鰲請一切報罷

上下其議于所司○二月羲英罷陞洗馬許國爲南

祭酒國字維禎歙縣人辛酉鄉試第一嘉靖乙丑

進士改庶吉士授簡討累陞至今職尋轉太常寺

卿仍領祭酒事立教不尚苛切多士雅化已推磨

事後并人學士代天子祀光師者再亦異數

也方國本未定時公爭之甚力是以忤言于告

歸平謚文穆公少讀書究峻止寺有碧雞之祥人
手成神器期之○九月工部請停止監生加納從
之

○巳卯七年張位陞中允以編修劉瑛補之瑛字玉
齋蘇州衛人辛未進士第二人

○庚辰八年十一月轉祭酒許國仍太常寺卿掌北
監事陞諭德戴洵爲南祭酒洵字汝誠奉化人乙
丑進士曾任北司業

○辛巳九年二月南祭酒戴洵自陳不職不允四月

御史郭惟賢科臣吳之美各有疏糾之遂調外任

○五月陞右中允高啓愚爲南祭酒愚字敏甫銅梁人乙丑進士未幾改北

○壬午十年七月以監生充正副使齋捧 皇子誕

生詔于所在開讀○起陞司經局洗馬楊起元爲

北祭酒元字貞復廣東歸善人講陽明盱江之學

歸先大父台麓公從焉至今咸稱爲復所先生高

足弟子○時許國陞詹事解任

○癸未十一年二月給事中馮景隆疏請召還前司

兼張位位陞中允坐浮躁落職補徐州同知是景
隆申白其事謂爲權相居正所擠應還職簡討趙
用賢劾江陵被簡洪陽曾賦詩送之○以南掌院
王弘誨爲南祭酒因啓愚改北也誨字紹傳廣東
瓊山人乙丑進士公先領鄉薦首年纔二十登進
士改庶常海忠介以直諫下詔獄公調護之甚力
江陵嘗謂私其子若弟公作火樹篇春雪歌以刺
之江陵啣公甚切通籍十四年始爲司業壬午以
諭德掌南院公爲祭酒謹身修行範士有方後遷

南吏部侍郎終禮部尚書○八月南司業劉城當
考滿有疾不能赴京遂請告○十月轉太僕寺丞
趙志皋爲南司業尋陞諭德皋字汝邁蘭谿人戊
辰進士第三人

○甲申十二年正月起陞張位爲北祭酒時楊起元
陞禮部侍郎位到任疏陳國學事宜六款一日修
衙舍以飭黌宮二日優陞選以重儒官三日簡生
徒以需仕川四日修經籍以備教典五日復科舉
以廣試途六日議考選以通銓法要將歷完守選

十年以上者吏部考擢每歲數人稍加優異與
註還○詔部議之部一如所請惟考選之法舉貢
既定五年爲率則十年以外不過援例納粟之輩
今姑以正歷十五年者照貢監一體揀選選退者
回籍守候正選不許再考

上從之○八月陞禮部郎中習孔教爲右中允管南
司業事孔教字時甫廬陵人戊辰庶吉士授編修
陞修撰外調○十月北祭酒張位復申從祀之議
云不宜專據著述但當夷考生平若薛瑄胡居仁

踐履篤實足爲後學之模從祀允當此外如蔡清
羅欽順輩皆其徒也若王守仁陳獻章悟識通融
能發先聖之奧從祀允宜此外如羅洪先王艮輩
皆其徒也乞救下禮部除薛瑄已經從祀外將王
守仁陳獻章胡居仁一體入祀

上下其議行之○陞南祭酒王弘誨南吏部侍郎以
南掌院黃鳳翔代之鳳翔字鳴周晉江人戊辰進
士第二先爲右中允管北司業事後終南禮部尚

○乙酉十三年三月南祭酒黃鳳翔疏叅不簡屬官
臧懋循奉 旨降調外任○五月鳳翔稱病請告
不許○六月起原任南司業劉城于北○十一月
祭酒黃鳳翔以監察御史黨傑論奏監生不法蜚
語誦上違犯學規得 旨逮付法司訊罪鳳翔奏
此事先經行屬體訪並無其人夫監試有兩御史
而諸生獨怨一人就試者尚有各衙門監生而御
史獨歸咎國學夫帖旣藏名其謀必詭先時不緝
而欲後時鉤距臣等力實不能乞敕南京都察院

與臣等公同廉訪務求明實不得徇私故縱亦不得偏執成心 旨下一如翔議

○丙戌十四年三月改黃鳳翔爲北祭酒公初以編修敎內書堂彙中涓有行誼者授小閣讀之中涓翟然易處鄒南皋以新第論斥江陵幾斃杖下公多方周旋得不死守史局十餘年乃得陞中允管司業事隨視南院篆改祭酒嚴飭規條型範以躬不稍徇干請餽饌有積逋公促督立正原額又有饌金數百坐蠶食者公皆清補之改北尋陞禮部

侍郎疏請建元良甚力後再起南禮部尚書歿加
葬祭贈官保公學術一稟紫陽其倡教鐸有宋學
士之風○陞諭德趙志皋爲南祭酒公初授編修
累官侍讀忤江陵會星變察百寮遂出爲廣東憲
副辛巳復以京察去官江陵歿補解州判陞太僕
丞擢南司業轉諭德歷官至武英殿大學士○陞
修撰沈懋孝爲南司業未任以編修余孟麟代之
麟字伯祥應天人甲戌進士第二公先祁門籍因
僑寓于南遂占籍戊子陞洗馬管北司業事尋陞

南掌院○六月吏部尚書楊巍北祭酒張位各陳
選法欲將納粟監生視歲貢監生例擇其文義精
通者叅授府佐縣正從之

○丁亥十五年二月陞南祭酒趙志皋少詹事以趙
用賢代之用賢字汝師常熟人辛未進士首館選
授簡討江陵奪情抗疏論之杖六十削籍卒未言
官薦起右贊善尋陞洗馬管北司業事其爲南祭
酒也惓惓以四維立教祭已陞南吏部左侍郎尋
改北千告所著有三吳文獻志及國朝典章因革

錄

○戊子十六年三月司業王祖嫡請復 建文年號
改正景皇帝實錄不報○四月南祭酒趙用賢申
飭監規修明 祖制凡七款一曰復勳胄送監之
制二曰修遺賢薦用之典自等江西舉人鄧元錫
劉元卿陝西舉人王之士三曰嚴監生久曠之罰
四曰查錢糧積逋之弊五曰正儒臣崇重之體六
曰申在監加納之禁七曰復監考防簡之役
上命吏部議鄧元錫等所授職銜餘俱依擬○五月

改南職方員外張一桂爲南司業桂字穉圭祥符人故以詞林起家從諭德調外者也○都察院左僉都御史詹仰庇爲故祭酒蔡清請謚并從祀

上下禮部知之

○已丑十七年二月南祭酒趙用賢力疾陳言救給事中李沂沂奉大誥張鯨下獄內因請冊立

皇太子言甚剴切不報○三月禮部奏下第舉人并副榜舉人分送入監并選教職從之○祭酒趙用賢稱久病不能供職懇乞放歸疏下吏部未覆

隨陞南吏部侍郎○陞司業張一桂爲南祭酒以
編修劉應秋補之應秋字士和吉水人壬午鄉試
第一癸未進士第三到任申飭功令惟謹憐才折
節視諸生如親子弟其不率者復嚴束之一時皆
變爲馴謹後鄧定宇先生爲祭酒同心砥礪論學
忘幼應秋子同升今丁丑進士第一人

○庚寅十八年陞南祭酒張一桂爲南禮部侍郎起
陞右中允鄧以讚爲南祭酒讚字汝德新建人中
辛未會元廷試及第授編修丙戌陞右中允管北

司業稱疾請養終母氏餘年茲復起南祭酒上疏
懇辭云祭酒師臣例不輕授文廟之祭以先生舉
酒多士之業以師氏考成孔訓莫先禮義而承以
肩進之心神必不享士習莫尚恬退而師以躡等
之身言必不從辭甚懇切上不允乃勉赴任其
直教敦尚本寔飲人以醇凡有懷來有叩必竭而
不喜以辯論相高其學務求自得故一生少所著
述陶石簣先生常云先生發精鏟華孤性獨復泊
然凝然而人服其有言終身寂漠之濱而世占其

足以大用人謂知言公後謚文潔

○辛卯十九年北祭酒劉元震題彰教維風必繇太學因循歲月成效靡臻臣以爲法雖難于復古而意則可遵士卽未盡知學而教當不倦請于常貢外間行選貢比先年例坐班一年准撥正歷而欲長善救失宜立彰善紀過二簿以示激勸取士必重經學以明理雅正爲準疏間 詔令禮部議之部覆選貢法于四審常貢之中間以一審選貢府學則五年一選州學七年一選縣學十年一選京

府學五年例選二名蓋使選貢之士得拔于十年
五年之間而挨貢之人止遲于一年二年之內既
爲精簡材俊不至有拂人情

上從之

○壬辰二十年七月陞南祭酒鄧以讚爲南禮部右
侍郎以南掌院余孟麟代之○八月改劉應秋爲
北司業以尚寶司丞馮夢禎補之禎字聞之秀水
人丁丑會元改庶吉士授編修辛巳忽中以考功
法坐浮濫去歷州倅以至皇丞其遷南司業也負

及問字者踵接千里頃之擢掌南院復遷南祭酒
先後兩任司成肅然爲諸生型典蒙其教而聞達
者不可勝數修葺諸經史必手自校讎後復以浮
言回籍聽勸卒之日業無餘貲所著有快雪堂集
行世公之舉南宮也蓋素經生業饒長安僧舍日
瞑目枯坐竟取大物蓋其致力于靜者深云

○癸巳二十一年正月吏部上言前祭酒趙用賢疏
薦劉元卿等學行純備人無間言至若王敬臣王
升馮行可砥行好修亦宜旌異劉元卿銓授國子

博士鄧元錫翰林待詔王敬臣已經除授博士無
容再議王升馮行可各進原官一級

上悉從之○四月余孟麟力懇休致以陸可教代之
○陞簡討李道統爲司業統字亦卿陳州人○十
二月改陸可教爲北祭酒

○甲午二十二年正月南禮部郎中張鼎思言選貢
人多兩雍解額宜各增三十名下部議終不果行
南司業李道統又以三十五名原數爲請禮部覆
行典試官查雍士文果多優卽中三十五名亦不

爲過第須秉公較量議終未盡一而北監以選貢
留北者多竟增二十名南北之偏枯始于此今解
額南一百四十八名北一百五十七名猶曰遼宣
士俱在北也並監也而南止三十二名北則四十
二名豈浮十名俱餉國學耶此不可解也同一孤
經也南止二卷北則四卷則相懸竟半北闈之春
秋禮記雍士常寥寥晨星而南雍每科不下八十
餘人此尤事理之不平者而莫肯上聞亦大闕
事

○乙未二十三年北祭酒蕭良有上言選貢之議始固欲樂育英才稍裨世用亦以太學空虛殊失

祖宗養士初心耳乃今府五州七縣十歲而一選羣然來也患在壅滯及撥去也又患空虛曷若總將兩京十三省酌量地方小大人數多寡品搭均齊預定某年某隸一某布政司或一或二行考選法至第二年更易遞選則來者不病于壅滯而去者亦不致于空虛 詔部議之○南司業季道統辭疾不能供職命在任調理○五月起原任洗馬敖文

禎爲南祭酒禎以病辭八月陞庶子馮夢禎補之
○改南司業季道統于北時道統業以病行南吏
科糾其擅離職任不問○九月陞編修黃汝良爲
南司業良字明起晉江人丙戌進士

○丙申二十四年十二月南祭酒馮夢禎奏隆儒優
士等事凡八款一曰加制額以拔優異二曰清久
曠以核寔班三曰嚴序擢以隆流品四曰優禮遇
以作士氣五曰催舉監以懲惰學六曰酌久任以
圖實効七曰補師屬以專教職八曰隆禮見以全

監體謂博助等官見吏部不應列部院首領之下
宜與監丞俱上見

上覽疏卽下部議之

○丁酉二十五年詔增監生解額北十五名南十名
以多選貢入監也是科後選貢遂輟至泰昌辛酉

崇禎戊辰復舉蓋以恩例非初選法也○南祭酒

馮夢禎奏請科場嚴限字之禁每篇以四百字爲
率禮部以各省不及遍聞俟場後行之○十一月
候補太僕少卿傅好禮疏叅考官全天敘焦竑因

北闈生員止中九十二名選貢八名監生乃中五十名謂兩臣有私條陳五說并請罷選貢勿增解額監生宜分南北卷天敘疏辨選貢八名乃學臣周孔教考送不在皿號之列何繇預知疏聞與好禮原疏俱下部院勘報

○戊戌二十六年南祭酒馮夢禎被論解任司業黃汝良亦去以光祿寺卿陳 擢監事○十二月陞右庶子郭正域補之正域字美令江夏人萬曆癸未進士改庶吉士授編修少善屬古文辭比入館

益復肆力遂有經笥之目其爲祭酒念辟雍敎始
郡邑所賦課士必根極理要一切西竺南華語禁
勿用又以太學古歲均官師以時簡俊造升之天
子今空文無實行嚴立黜條科貢諸生本經外各
兼一經已未成材者增大誥經書兼之讀律有犯
令者罰無赦一時學行並興司成三載所爲杜弊
繩墜及廩饌之清稽凡例甚設絮爲令拜禮部侍
郎力持謚法不少假借會楚宗日生事發力辨求
去而妖書又興讒口波騰竟以善處不結于難歿

之日產不逮中人所著有皇明典禮志行

○已亥二十七年八月陞簡討傅新德爲南司業德

字明甫山西定襄人己丑進士

○庚子二十八年十二月南祭酒郭正域建議八款

一曰廣士額收真才以充學校內云選貢一途不

必另考卽丁歲科考第一名貢入或二名內原

深者充之卽照胡謨分經術治事二齋以教諸生

詳究心實學而更行天下訪求通音律算數及篆

隸六書五行曆數者分爲四科考送禮部照貢例

分撥入監二曰禁罰銀嚴罰班以一賞罰三曰稽
歷事復畫押以警淫蕩四曰禁濫差革超撥以杜
請託五曰覈錢糧審出納以防侵濫六曰勤課誦
分等則以修職業七曰別賢否明斥陟以示勸懲
內言監局八曰察實歷改限期以勸實學末又言
納貢之法宜嚴禁勿行在漢之末賄賂公行而掄
才一事猶曰徵曰辟今乃爲漢季之所不爲乎若
選貢法當亟爲酌行不得報罷也

上下部覆之○是年豐城侯胄子李誠祚習禮三年

又九月因父艱扶視歸北國學甚稱之

○辛丑二十九年九月南祭酒郭正域晉詹事管纂修玉牒去任

○壬寅三十年南司業傅新德又以給繇解任以南太常寺少卿鄭材掌監篆

○癸卯三十一年四月陞南司業傅新德右中允○八月令監生得入貲授文華武英二殿中書○十一月南掌院王圖攝監事

○甲辰三十二年三月奏補 福王講官于兩京助

教等官及進士選任著爲令○七月禮部署部事
左侍郎李廷機爲理學名臣前祭酒蔡清請謚詔
議之九月止贈禮部左侍郎○十月陞右庶子劉
日寧爲南祭酒日寧字 江西人己丑進士陞
簡討朱國禎爲南司業國禎字以寧烏程人己丑
進士

○乙巳三十三年十月陞博士董應舉爲南戶部主
事應舉有經濟才在國學持議侃侃不輕徇人後
官都御史專理屯田未竟其績

○丙午三十四年南御史孫居相等以監生懷挾請行令以後科舉必如舊制考選精通三場者方許入試不得濫取充數從之

○丁未三十五年二月陞南司業朱國禎爲諭德以簡討朱延禧代之禧字允修聊城人乙未進士兩

朱公後皆爲大學士○北國子監署監事司業沈

淮上言三款一曰敘撥之規二曰假曠之規三曰

叅處之規內云監生經本監叅處者別衙門不得

緣恩請復敕下禮部議之禮部覆行并申飭木牌

整齊嚴肅四字令諸生遵守○八月陞諭德朱國禎爲北祭酒

○戊申三十六年二月陞南祭酒劉曰寧爲少詹事
充日講官雲嶠先生未第時豪宕不簡後嚴事鄧
定宇先生遂歸醇靜旣成進士復從先生游憇山
中數年英氣消鎔殆盡穆然寧澹無愧人師○六
月陞侍讀林堯俞爲南祭酒俞字容伯莆田人己
丑進士未幾爲御史梁邦彥疏叅俞屢疏乞休不
允是年十二月北祭酒朱國禎未任亦爲彭端吾

旨勅讀奏辭詔諭前來供職

○巳酉三十七年三月南祭酒林堯俞三疏請告乃

允陞諭德史繼偕代之偕字

晉江人壬辰進

士○十月陞傅新德太常寺卿視北祭酒篆次年
卒賜祭一壇減半造葬以蔣孟育代之

○庚戌三十八年正月陞南祭酒史繼偕南吏部侍

郎偕後入內閣司業朱延禧爲右中允命南太常

寺卿劉曰梧視監事○六月陞編修顧起元爲南

司業元字太初江寧人戊戌會元廷試第三人○

八月陞湯賓尹爲南祭酒尹字嘉賓宣城人乙未
會元廷試第三人

○辛亥三十九年五月陞孫如游爲右諭德掌南院
尋來視監策○八月陞庶子蔣孟育爲南祭酒

○壬子四十年陞編修溫體仁爲北司業體仁字長

卿烏程人今大學士○應天府尹汪道亨請增解

額欲總添二十名分三十五名歸監生其餘歸學
先是前祭酒郭正域與祭酒蔣孟育皆有疏謂南
北監生中額不均要行盡一俱未有定議至是言

官及京兆尹各以爲請禮部議加南京七名御史
熊廷弼條議當如天順加額事例加二十名一如
諸臣之請監生額數如北定三十五名是等類一
百五十五名監生得三十五名今裁去七名監生
僅得三十二名是裁七名而監生竟去三名矣豈
非理之平歟

○癸丑四十一年二月南祭酒蔣孟育再疏請告不
允○禮科余茂華請開選貢不報

○甲寅四十二年八月陞南祭酒蔣孟育爲南京吏

部侍郎○十月署監事王毓宗請南京監官俱得
考選如嘉靖年間童承敘程文德所題博士周京
助教呂蒙學正陰汝登學錄鄧文憲皆得考選列
風紀之司不報○十二月陞傾起元爲南祭酒

○乙卯四十三年三月禮科請前祭酒禮部侍郎郭
正域謚○五月禮部覆議今科解額南北止加十
名南以三歸監北以四歸監○南御史郭一鶚奏
國學兩廂並虛乞催顧起元到任時起元以喪妻
喪子在告乞休疏云失羣之鳥三匝而鳴哀哭子

之錄數聲而腸斷得 士令起元遠理蓋事元后
諸生卽有志經世綜緝千古研幾性學其表率博
士弟子風規峻整無敢執經之外者○禮部再議
停納貢事例

上下其議酌之○陞簡討汪輝爲南司業輝字德仲
尚縣人甲辰進士

○丙辰四十四年三月御史過庭訓爲東省災荒建
議援納量減銀數准貢不必議停部覆聽于東省
六府暫行○陞右庶子周如磐爲南祭酒磐字聖

培莆田人戊戌進士○陞南司業汪輝左中允

○丁巳四十五年正月原任南祭酒顧起元自陳不職詔遵新旨赴少詹任○十月禮部疏請前祭酒郭正域劉日寧已經閤擬謚法進呈乞賜點發

○戊午四十六年八月陞編修施鳳來爲南司業來字羽皇平湖人丁未會元榜眼及第

○己未四十七年七月陞庶子孟時芳爲南祭酒芳字斯盛蒲州人戊戌進士○陞簡討成基命爲北司業命後避廟諱改名靖之仕至大學士字豸子

大名人丁未進士○八月監生王應達奉 詔修志

○庚申四十八年八月陞南祭酒孟時芳少詹事纂修玉牒○十月南太常寺卿曹珍十一月應天府丞鄭璧先後攝南監事時已改尚寶司丞汪元極爲司業被劾養病故也

光宗

泰昌庚申元年八月北太常少卿李宗延奏請修明禮樂以光祀典內云司業成基命所著類官禮樂一書議九廟禮樂其備當采其議而行之詔可

熹宗

辟雍紀事十四 辛酉至丁卯凡七年

天啓辛酉元年申定監生解額南三十二名○是年南太常寺卿楊材光祿寺卿馮若愚復先後攝南監事

○壬戌二年二月陞左庶子黃儒炳爲南祭酒炳字士明順德人甲辰進士○四月陞編修葉燦爲南司業燦字以冲桐城人今爲南大宗伯○五月南太常寺少卿區大倫攝監事實經始南雍續志倫字孝先高明人 進士初授東明知縣考選雲

南道御史以修省郊祀糾劾勲臣三疏奉 旨爲

民泰昌元年起光祿寺丞歷陞今職後陞吏部侍

郎所著有端溪日錄行世○監生唐時以修志勞

准貢授通判○八月儒炳蒞任飭規條尺寸不爽

士類翕然宗之○九月纂修本監兩朝實錄成○

十一月儒炳督同學錄葛大同修整二十一史并

前續志底稿再爲繕較多所論敘繕寫藏之後祭

酒李孫宸至乃授梓焉

○癸亥三年禮部覆議恩例副榜每生員中百名截

二十名監生五十名截十名爲副榜廩准貢監監
准貢選不得溢額以滋倖濫 詔從之○禮部左
侍郎鄭以偉以事例濫觴致賸生日煩實納轉少
條其所以剔蠹者有四一曰給付之單款宜覈也
一曰文移之應照宜詳也一曰吏胥之奸弊宜鋤
也一曰督監之分任宜專也 又特設主事一員專
管監中得旨如議行○八日南祭酒黃儒炳司業
葉榮合請修理國學并及通賦事內云南監錢糧
其在萬曆年間歲入勒之板榜者止二千兩有奇

而一歲之所支者政不止是今勉爲節省僅可支
一年倘通解不清從何辦給旣敷敷無地又養士
不贍勢不得不告諸 皇上也○八月陞黃儒炳

爲南吏部侍郎○是月戶部奉 旨行監撥監生

三百五十名查理黃冊○九月始得修理學宮之

旨咨南工部行焉○十二月陞左庶子唐大章爲

南祭酒章字伯和豐城人丁未進士○陞南司業

葉燦爲左中允南太常寺卿李維楨攝監事○楨

字本寧京山人戊辰進士後陞南大宗伯○起陞

修撰莊奇顯爲南司業顯字



永春人丙辰科

○甲子四年四月大章視事上言恩選畢集解額未
增請遵舊例以廣監額併復陞遷成規以勵教職
內云恩詔及副榜不下十餘人此千餘人者較往
年應試而頓增者也乃中式舊額止三十二人辛
酉加至三十七倘今秋拘此成額往猶六十取一
今且百人取一矣宜照恩貢太學隆慶五年兩京
鄉試例各增五十名萬曆二十二年選貢集太學
順天增二十名緣是年廷試貢生無告南者故止

增北而不增南至二十五年選貢分送兩京各增
十名 皇上登極應天增十名五名以登極恩其
五名則以 先帝恩貢入太學也豈 皇上獨于
自選諸士而靳之乞敕該部或照萬曆二年例暫
增二十名或照隆慶五年例增十五名至分敕諸
臣按陞遷之法自監丞外有陞簡討者六人有陞
選御史者五人如南御史葉世治則 皇祖朝以
博士選者也至部屬理評則比比從先相望矣今
何樂轉府同知州卽部司務亦不數數司是職者

何以勸焉敢因加額而并陳之不報○又具疏請
以大學衍義補進經筵日講不報○八月陞唐大
章正詹事以南禮部侍郎攝監事未幾又以南太
常卿蔡應麟光祿卿彭遵古先後攝監事○十一
月陞南太常少卿李思誠爲南祭酒誠字自卿興
化人戊戌進士○以右諭德李國楫管北司業事
楫字 高陽人癸丑進士○陞編修林鈺爲南
司業鈺字實甫同安人丙辰探花後爲大學士卒
于官○陞庶子王祚遠爲北祭酒遠字夏明普安

人癸丑進士

○乙丑五年三月恩誠視事端執肅度穆然有先輩
典刑四月晉禮部右侍郎五月陞庶子李孫宸爲
南祭酒宸字伯襄香山人癸丑進士後陞南禮部
尚書宸未至太常少卿文翔鳳攝事六月到任與
僚屬諸生相約五事勸德行復成規精考課剔夙
蠹革超撥凡事斤斤畫一以守

○丙寅六年正月林鈺蒞任五月陞中允以簡討劉
鍾英補之英字 庠城人癸丑進士○六月李

孫宸陞禮部侍郎以左諭德羅喻義代之喻義字

長沙人丁未進士

○丁卯七年十一月陞羅喻義禮部右侍郎協理詹
事府事○二月以中允林鈺管北司業事尋陞祭
酒○十二月劉鍾英陞任以簡討文安之補之安
之字 夷陵人壬戌進士○陞朱之俊爲北司
業俊字 汾陽人壬戌進士

辟雍紀事十五

今上崇信聖學隆禮師儒登極以來所嘉惠成均者
史不勝書顧宏綱大目俱載史館曆祚無疆莫可
揚扆謹錄兩司成銓除歲月以附年表

崇禎戊辰元年陞北祭酒林鈞少詹事仍管監事八
月陞詹事以庶子孔貞運代之貞運字開仲句容
人已未進士第二人尋陞少詹事今大學士○陞
簡討陳盟爲北司業盟字無盟富順人壬戌進士
陞洗馬管司業事賀逢聖爲南祭酒聖字對揚江

夏人丙辰進士第二人尋陞少詹事今大學士

○巳巳二年七月陞諭德顧錫疇爲北祭酒疇字九疇崑山人巳未進士○十月陞編修姜曰廣爲北司業廣字居之新建人巳未進士今少宰○陞庶子侯恪爲南祭酒恪字若木商丘人巳未進士

○庚午三年二月陞編修陳仁錫爲北司業仁錫字明卿長洲人壬戌進士第三人謝德溥爲南司業溥字登可東鄉人壬戌進士

○辛未四年以諭德吳士元管北司業事元字長吉

進賢人己未進士以右庶子姜曰廣爲南祭酒

○壬申五年陞吳士元爲北祭酒陞庶子胡尚英爲南祭酒英字起凡臨清人己未進士○簡討王錫袞爲南司業袞字龍藻雲南人壬戌進士

○祭酉六年

○甲戌七年七月陞簡討馬之驥爲北司業項煜爲南司業驥字勝千益都人煜字仲昭吳縣人俱乙丑進士○陞庶子傅冠爲北祭酒冠字寄庵進賢人壬戌進士第二人陳仁錫爲南祭酒未任卒以

庶子方逢年補之年字書田遂安人壬戌進士

○乙亥八年六月陞庶子倪元璿爲北祭酒張四知
爲南祭酒潞字玉汝上虞人知字貽白費縣人俱
壬戌進士

○丙子九年二月陞編修何瑞徵爲北司業徵字荆
屏信陽人戊辰進士第二人章紹寧爲南司業字
守誠齊武進人戊辰進士第三人○九月陞左庶
子紹可紳爲北祭酒紳字襄河直隸人丁亥進士
十二月陞右庶子許士系爲南祭酒系字仲嘉常

美入壬辰進士

丁丑十年陞編修周應翔爲南司業翔字



所

江山陰人辰進士

辟雍軼事

助教吳琳歷陞吏部尚書致仕家居躬耕力學

上遣使察之琳正在田間布稻使聞

上益重之

學錄杜環有父友常允恭死于九江其母張氏年六十餘哭九江城下無所歸環迎養于家事之如母後逢其少子伯章促之視母章以母老給環他事辭去環奉母彌謹洎其歿也親爲之殯葬歲時祭其墓勿絕學士濂有傳

博士趙俶乞骸歸

上締視之曰向爲兵部侍郎出知萊州者卿之子耶
俶對曰是也

上曰卿誠耄矣俶頓首而退詔出內藏錢賜之初俶
子圭玉官法從俶作訓忠書教之繇是服官有盛
名俶後以八十一考終于家

學錄李誼以山林隱逸徵入見年已七十餘矣

上見其言動甚重之命教親王駙馬三十一年以病
乞歸田誼常自贊曰壯歲端居暮年見舉應詔明

光敬對天語益亦自隆其遇云

助啟陳南賓擢蜀府長史蜀 獻王聞其名尊禮

有加後復應聘主考四川最稱得士卒年八十公
作詩清勁有法在蜀詠少陵草堂云西出秦關道
路長岷峨東望樽蒼蒼蓬萊三賦舊無敵同谷七
歌今可傷茆屋風高秋瑟瑟布衾銕冷雨淋淋浣
花溪上應回首千載令人憶草堂

典簿蕭邦現廬陵人性至孝少讀書不盡解父母
貴之因刻勵爲學舉明經爲邑訓入典國簿聞諸

生有三年省祭及養親者必委曲成就之有不顧
父母之養者必訶責之祭酒張顯宗司業張智皆
禮重之以其堂扁養志學者皆稱爲養志先生

國子生師達字九達東阿人少孤事母孝年十三
母病思得蘇花菜爲母遍求之歸途遇虎逵跪而
呼天虎竟舍之去乃持菜還母食之遂愈後以國
子生陞御史終南戶部尚書已上皆洪武時事

國子生景清以鄉薦遊國學見同舍生有秘書借
之靳不肯與清固請期旦日卽還生旦往索書清

曰吾不知何書亦從未假書于汝生忿怒訟之祭
酒清卽持書詣廂曰此清自携因誦書徹卷問生
生不能誦一語祭酒叱生生慙退清卽以書還之
曰爲子珍秘太甚故相戲耳清後仕至御史大夫
死靖難建文時事

博士羅師程名恢以字行吉安人洪武癸酉以薦
授崇仁訓秩滿又膺薦入史館兼較國學經籍兩
與纂修實錄陞國子學錄師範端嚴前後受業者
千餘人滿考遷博士又六載乞休司業吳溥少游

其門率六館生數千人祖送之人爭羨其榮年八
十二卒自號雪菴居士永樂時事

祭酒胡願菴先生儼少時能自得師同邑有熊伯
幾雅善古文辭見儼亟稱其有養遂以古文法授
之文因大進後歸田善處人羣身爲舊德耆俊而
未嘗有腆倨之色大學士西楊先生有詩贈之末
云城中冠蓋多如許解識堯夫有幾人又云已知
安定渾無累猶有人求伏氏經可以想先生溫靜
之槩矣洪熙時事

國子生費鉛山鵞湖宏以鄉薦試春官不利卒業
北雍時丘文莊爲祭酒費補菴爲司業皆器重公
丁未遂舉進士狀元及第公初上春官其伯復菴
以水部治呂梁洪謂公曰汝脫下第毋歸宜入雍
讀書公駭而訊之曰何以遂知宏不第復菴咲曰
此爾遠到之兆也吾嘗夢汝入監領班籤乃彭文
憲故物文憲以遊雍中狀元汝當繼其躅耳至是
果然後亦謚文憲

祭酒周文安洪謨爲司成教士甚有法獨性惡鵠

鳴監多灌木公聞其聲多方求捕之因令監生捕
得鴟鴞者予假三日人傳爲笑柄意者公忘好音
之懷耶不然集泮林而食桑椹者何物也二則俱
成化時事

祭酒章楓山先生懋有策士問其一云孟子論學
爲三代所共宜其無異名也而禮有上庠東序右
學東膠成均辟雍之異何不合于古與孔門傳大
學之道不過三綱五目宜其無他道也而禮有三
德三行六藝六儀四術四教之目何以不同於大

學與師一也而有司樂樂正師氏保氏司成司業之職何以分士一也而有曰選曰俊曰造曰進之義何所取周之五學與漢之三雍唐之七學宋之四學其數之不同亦各有說與今太學之六堂其亦有同于古與古之士以德業相先今乃行業不修惟筭撥歷之月日豈以是爲寸陰惜耶古之學以明經爲務今乃經術不講羣爭短差之甜苦豈以是爲奪錦標耶欺誕相習每稱病以免坐堂奔競成風或附勢而求速化憚拘簡而樂放縱避

勤勞而求安逸若是者可望其有成乎其二云國家積分之法固宜亟舉矣湖學經義治事之敘程子吏師尊賢之議亦可用乎抑別有其道乎前代太學諸生有舉旂而救鮑司隸者有倡義而不污朱泚者有殺身以爭宰相之用舍者有捲堂以愧宰相之起復者亦有優劣之差乎觀兩問知先輩重實學如此如積分復則策問亦可行今雖有實飽之士何從見之也先生爲僉事時考蹟至京遂引疾求謝事太宰尹旻諗之曰汝不能軟不貪酷

不老疾如何可退先生曰古人正色立朝懋之懋
軟多矣古人一介不取懋之貪多矣古人視民如
傷懋之酷多矣年雖未耄鬚髮早白亦可謂老疾
矣請舉一以退之太宰撫然驚嘆知其志決乃爲
奏請先生雅不欲以著述名僅有金華鄉賢志
及遺文數卷子孫皆天歿僅餘一孫詰復不慧年
八十一始得少子接

上優詔錄爲國子生

法治年事

石文隱珪爲祭酒也教法嚴邃而能濟之以恕士

樂歸之後當

世廟時議禮初頗持正而言時有依違門生當柄者遂謂其隱情不盡故謚法微刺焉正德時事

司業景暘腹大而矮當

武宗南巡時諸司朝叅公不能俯幾失儀江彬大聲問曰第幾班第幾人是某衙門官是該拿人數應天府尹喬宇應聲曰是南京國子監堂上官例免糾遂不拿問蓋出于一時權宜而能全儒臣之大體國子監錢糧例不刷卷故往有金祭酒銀典簿之

謠正德戊寅雲間陸公深自編修轉司業適祭酒
缺署篆稽考錢糧其實無有簿廳至揭債支吾問
之曰前司成石熊峰來細查已悉此苦適送供堂
皂隸銀數兩至色如黑銅公笑語吏曰今日得無
又添一銅司業乎聞者絕倒

司業穆玄菴孔暉性愛竹署中多美竹公吟咏有
得輒題其上後郭价夫爲司業公贈以詩有句云
書聲山下月詩思竹邊秋崔後渠見之曰玄菴一
聯可謂摹寫入妙已上皆正德年事

祭酒崔後渠先生銑少舉于鄉入太學祭酒謝鐸
歷試俱首大奇之後爲南司成罷歸其尊甫大參
公陞尚在先生孝養備至歸舟賦詩有云故園菽
水知堪養捷徑南山保未曾後罹艱哀毀不替終
身之慕

楊升菴先生慎大學士石齋公子也生而岐嶷穎
達十九魁于鄉戊辰不第就業于國學祭酒周玉
類試之曰天下士也辛未會試第二廷試第一制
策援史融經敷陳弘剴時年纔二十四丁丑爲廷

試掌卷官見舒芬策大奇之亟薦于梁文康遂得
首芬亦生而穎異亦以丁卯舉于鄉戊辰不第卒
業南雍夜分不寐于書無所不讀尤嗜濂溪學常
稱爲中興之聖二公文學同鼎甲同肄業太學亦
同洎其後議禮廷杖以至遷謫無所不同已上皆
嘉靖年事

祭酒陸平臺先生樹聲少以父鞠于母氏故姓林
旣貴而復陸請告歸時唐荆川先生以中丞禦倭
見公嘆曰公得請未知余何日歸耳公曰某如西

賓病則主人只得放回公乃良醫病未愈如何肯
放去

國初養士每日會饌特于珍珠橋置椿堤障水爲
磨盤有厨屋五間今无盤俱廢惟二石鍵尚存廣
業堂後有大鐵鍋灶缸石作等物東西兩廂各有
大銅缸二前更有石盤一堪作蓮盞祭酒程文德
爲之銘曰吁嗟石池琢自何年憶當會食以浙以
蠲時不爾用滴此清泉幽蔭槐竹閒寫雲天顯晦
隨時仁智道全吁嗟石池君子式焉

祭酒劉應秋先爲南司業與諸生約遇夜吏胥呼
門期無後至諸生治蕩者俱改節杜門癸巳再以
右中允管北司業丁酉遷國子祭酒受事卽戒不
得用公家一錢供帳諸具一切裁罷飭法如南雍
而稍劑之以寬會三殿災因進漢魏書推明二代
得失大都以遠寵佞戒宴安而歸諷于建儲表進
上尊善會與勳弁李如松有隙計傾之遂請告所著
有仁宣穆三朝紀周易大學衍義解詩文若干卷

萬曆年事

附名賢雜詠

○太常寺丞袁廷玉賦石峇歌

瀛洲迢迢隔溟渤不助昆吾鑄奇物杏壇花開春晝
遲帝造良工琢山骨圓如蒲璧巨如輪三尺瑤臺
高捧雲離南坎北已定位制度安用羅星辰六堂升
沉更涌杳旭日扶桑照林表一絲影射白玉盤萬井
鐘聲報清曉先生盛服坐臬比猶記花磚催直時寅
賓出納著二典赤心只許羲和知帝命晨昏教門
子寸陰自惜勤終始莫言此畧匪涓埃大明教化從

炫起

○貝瓊送許存仁省墓詩

國賴師臣重人推老學優岳宗千仞表海混百川流
雅器全鐘異清姿玉露秋鱣堂資勸獎鶴駕屢淹留
浙水宵馳夢秦淮曉發舟都門華帳席先隴憶松楸
森森滄波隔迢迢翠谷幽尋仙踪杳邈報國意綢繆
聖上多詢訪諸生待講求重來愛春好淑景耀皇州
○劉誠意送林伯雲省親

生兒須男不須女二十離家事明主繇來卿相出白

屋志士寧甘守環堵天上黉宮古庠序濟濟衣冠驚
鸞羽學業須兼文與武濟川期舟早刻雨懸壻看書
困石眠的心問道機忘咀嚙來忽覩沐則鳴雛飛哺
母聲啞啞恍思高堂缺溫清稽首天閣動天聽春烟
蒼茫春樹綠水煖芹芽白如玉扁舟蕩漾駛歸風綠
服飄颻炫晴旭盈門弱柳鵝黃絲鶯鳴如絃花滿枝
開門見兒喜不定問言執手仍牽衣牽衣上堂拜嘉
慶籩豆既具飯且時兒前勸酒還蹈舞親戚滿筵譁
笑語朱顏婉婉暎青松鶴髮蟬娟照芳醑爲子歌一

山送子江之湄到家早來旋勿爲兒女慈人生有親
樂莫樂况乃君恩重山嶽讀書不可迂簡身不可疎
勸子慎勿學世儒誓言耻行名爲愚君不見良金鑄
爲器鼎鼐烹飪干將利才全德備稱大賢報國榮親
兩無愧

○胡儼夜宿廂中詩

秋風灑竹枝涼氣入練衣
崔嵬背月中冷螢光雨後微
紫垣當講席玉漏隔彤闈
良夜清如許思親苦夢歸
○胡儼送學錄王讓省親詩

曉拜封章謁告還，趣裝隨見理征鞍。
故園月落烏啼冷，驛路霜清馬足寒。
杯豔紫霞開綺席，衣裁紅錦舞雕闌。
明年遠奉潘輿至，多士譙門擁篲看。

○大學士金幼孜贈教授張子儀赴留都博士

新除博士留都去，一騎迢迢發薊城。
久別未忘鄉里意，相逢不盡故人情。
夕陽紅樹孤帆影，遠水寒烟落雁聲。
爾教成均知不忝，深期作育贊皇明。

○學士王直送胡儼致仕詩

兩京榮遇位賓師，投老還家鬢比絲。
天上玉堂春夢

杏江南盡觴盡行遲
靡蕪香動春風煖
楊柳枝長宿雨滋
歸到秋屏南閣望
西山依舊碧參差

○陳敬宗上丁紀事詩

聖道師萬代天日同
巍巍仲丁屬明祀
絜修謹先期晨興入廟門
肅肅慎容儀豆遶及樽罍
濯濯親蒞之既滌還復
漑清泉重淋漓神享惟一
誠孰云在多儀承事貴有
恪寅恭益孜孜允懷夙將
命惕惕安敢違炳靈諒昭
昭庶矣其歆茲

○大學士金幼孜送博士孫貞

孫君鄉邦彥十載居僑門羣材齊樂育仰欽博士尊
况聞篤義方有子才且賢伯也領司牧季也登詞垣
聯翩耀文采宛若鸞鳳鸞三朝偕際遇涵泳雨露恩
忽茲去榮養投簪賦歸田驪駒戒明發祖餞相攀援
遙遙指南浦江流浩沕沕桑梓故無恙松菊今尚存
上堂接親賓入室撫兒孫閒居樂有餘逍遙閱晨昏
故鄉未同往中情何繇宣因茲寫長問庶以道殷勤
○正統元年正月二十日百官謁先師會祭酒以
下官交拜遂譙于東堂前此未有也敬宗有詩紀

事

車騎如雲滿路香
爭看謁聖到虞庠
元辰不用呈椒頌
新節偏宜舉柏觴
玉帶錦袍相照耀
鷹冠象簡總輝光
眼中磊落多英俊
獨愧顏齡兩鬢霜

○楊守陞送謝鐸南祭酒

鎬京建學四方同
豐水猶存舊辟雍
聖代遠遵周典禮
賢關新待漢儒宗
三千負笈來衿佩
億萬闔橋聽鼓鐘
從此英才歸樂育
明堂梁桷待登庸

輶傳東來起謝安
重携彤管入金鑾
鹽梅未試和羹

手俎豆先歸祭酒官
虎踞城深槐樹市
鷄鳴山繞杏花壇
皋比講罷多清暇
好著經書百代看

○後守陞以侍郎兼攝南雍事謝鐸次韻贈之

聖祖心真大造同
卽從開國講臨雍
斯文漫說天將喪
吾道今爲世所宗
賸有主成隨化雨
不須善問撞洪鐘
作人功在知無極
况復先生此奮庸

十年騎馬候長安
幾共鏘鏘聽八鑾
萍水不知無異味
夢魂猶憶是同官
金蘭未改初心約
鷄犬翻嫌軟血壇
珍重贈行詩句好
南雍志在有人看

○守陞初攝祭酒有彝倫堂詩

彝倫堂上鼓鐘聲三舍先將教業呈
涉筆僉書小冢宰攝官承乏大司成
天威咫尺虛中座地闊尋常傍左行
淺薄未知模範否若爲陶冶魯諸生

○守陞考滿乞歸祭掃有辭廟詩

攝官首夏朔初來解印高秋望始回
慚負菁莪時雨化宵教紅杏倚雲栽
官牆數仞趨庭別省部三年報政催
六館師儒情戀戀篇章珍贈更傳杯

○方國學之未建也博士等官俱在內府大本堂供

事吳元年既設祭酒于國學仍入內府授經如故
祭酒魏觀有詩紀事

旌旗旖旎集中衢日上金橋劔珮趨雙闕雲中開鳳
扇六王天上捧龍輿成均被命仍敷教大本承恩復
說書殊渥無涯嗟未報幾回退食重躊躇

後祭酒司業爲經筵講官及侍東宮講讀因此

紀盛事一

今上登極之明年躬視太學行釋菜禮奠獻畢御彝
倫堂祭酒司業循故事進講如儀講畢宴賚有加
時祭酒卽今大學士孔公貞運也 聖作物覩適
遇聖裔爲國師豈非千古之曠見乎維時儀郎爲
孔聞籍禮科孔聞諱一時躬逢大典寅清之屬皆
國里子孫尤爲奇邁文明肇造若啓若翼疑有神
授寧特運會之隆歟

紀盛典一

歲乙亥

上從省臣郭九鼎朱邦祈暨北司成傅冠等請諭禮部確議拔貢之典部條議

上允行命鎖棘再試之一切視鄉闈法維時各畿省督學使者暨直指惠文君凜功令加茲分房較閱合十五國得士凡一千一百有奇丙子四月鱗集京師禮臣請期

上命先歲薦士而廷試之用示優異也試之日大

宗伯引奏諸士各于 皇極門行叩頭禮始各就
硯席題凡四書一經一論策各一抵暮竣事閣臣
同掌院臣進六詞臣而分較之第甲乙如故事禮
臣以名聞復請如初議赴部再覆之題如廷額以
示嚴慎實異數也試竣

上命分撥兩雍補胄子之選維時大江南北暨浙閩
江楚之士俱以例肄業于南

上以豐鎬故慎重師臣之選先是拜東費印巖張公
爲大司成繼復拜晉陵誠齋管公貳之二公俱文

章宗匠海內人士望之如泰山北斗故多士朝受命而夕腊秣不匝月而雍門濟濟如林焉且近奉明旨歷事各曹署者統歸監科試兼之上公車者奉功令皆從成均受牒後先鼓篋復有千餘人一時賢關頓爲生色兩司成按期課之與俊造無異而稍寬其期會以便北征若俊而升者則秋試外一日不少假借嚴率而寬敷之士子亦樂承教不復僥倖假撥矣是年冬印巖張公晉宮詹隨擢右庶子海虞石門許公補之許公尤海內鉅望橋門士

爭快得師云

先是北司成倪公元璐曾有疏請欲分正流閭流以復積分之法會以註免議格不行夫士不鼓舞不知勉激今春和景明班復者必踴踴濟濟矣當事者盍一爲申飭俾造士之精神有動乎

丙子季夏東吳之士馮士驂濫竽升俊鼓篋南雍
于時五國之士園橋門者四百有奇驂攬盛事于
賢關緬舊京之遺澤庶幾

社訓矜式師模快鼓鐸之更新冀燕射之可復聿追往
蹟仰睇重光謹拜手稽首而作頌曰

陪都翼翼四方之極 神聖開天考中肇域鎬京
辟雍孔曼且直旅楹有閑闕宮有恤春秋匪懈享
祀不忒奕奕大猷震耀南北教學爲先君民建國
業廣功崇訓章用敕敕彼訓章 聖謨洋洋禮在

瞽宗書在上庠終始念典嘉言孔彰胄子誨虞蒙
士訓商師氏保氏教養互詳乃升俊造慮憲求良
庶明勵翼罔不奮揚鳧翳旣醉載喜載颺載颺載
喜聿懷胄齒棧樸菁莪芄芄蔚止廸簡 王廷謫
多吉士鼓篴成均肄三官始鬱彼杏壇猗歟槐市
利用賓王振振麟趾赫赫父師如誨厥子樂正贊
之言提其耳提耳維何履中蹈和是訓是式爾楷
爾模蒸我髦士攸宜切磋一稟經師罔敢或吡小
胥人胥協正其頗有篋維樅有鼓維鼉匪怒伊教

雖嚴不苟敬慎威儀漆漆峩峩漆漆無文咸
秩曰駿奔走恭恪靡佚樹羽崇牙雅南同律鞀磬
汎敬以翁以證 帝曰欽哉直溫寬栗實惟司成
左右常吉孝德翼馮陂子時衡烝徒增增衿裾孔
佶既佶衿裾職思其居展也大成雍肅有餘時敏
遜志聲聲徐徐行遠言文令名德與靡敢愆止靡
敢躊躇春秋禮樂冬夏詩書官師翌翌良士與與
於論於樂嫻習雅魚雅魚嫻習尸齋坐立修辭立
誠望古遙集小子有造成人倍汲釋菜臨雍有恪

其執羞考饋餽永懷靡及抗法商讓儀顏柔輯凡
厥舊章載考載緝乃歌蘋蘩乃命決拾決拾攸同
匪武之攻內正外直祇取其秉祭非中多有覲澤
官序賢序賓教孝教忠揚解敘黠疇敢濫從不失
已鵠坎鼓逢逢躋躋獻馘旅矢彤弓我戰則克爰
奏膚功膚功有繹紹聞祇適德音孔昭振古如一
乃武乃文仔肩時弼羽籥干戈以相以質經術文
章覃訏厥實

皇祖有訓毋敢爾逸壽考作人億萬斯表鴻都四門豈

足云匹

東吳馮士驊謹頌

文廟重修頌

上銘以海濱獻士承乏簪笏掌簿書懼鯨乃職
顧惟崇祇

先師爲靖共爾位之本厚 兩司成不棄修廢舉墜
時采菲葑恒於釋菜之辰叨陪對越式瞻

文廟棟甍半圯下逮兩廡莫蔽風雨愴焉心疚如神
我恫亟請冬官鳩僝乃役命日量工以十旬竣事
師之靈也 兩司成之命也同寅交贊之功也余小
子何力之有頃上丁釋奠萬舞洋洋廟貌有赫駿

奔走者罔不載抃載忻謂斯役也費省工堅不愆
于素鴻章紀事已在麗牲銘藉手告成思樂泮水
敬效清風薄巾短頌頌曰

猗歟辟雍五學之中明堂定位類宮乃崇兩都並
建如鎬有豐菁莪教澤南國首鍾載祀三百規制
益宏式廓靚深有恤者宮輦飛鳥革大煥其容閑
杞維旅挺桷維松罇彝俎豆繽紛鼓鐘春秋享祀
苾芬孔融紳衿蹕濟于斯會同以勑以建惟

皇之功以修以時師臣之庸陟降庭止盼鑒會通敢

俾弗戒剝墜雨零乃晄乃顧淵冰在衷乃究乃度
實維司空物土慮用梓埴互攻先塗蔭茨周彼垣
甬載勤樸斲丹雘以從枚枚實實克竣厥工棟宇
峩峩若廓而隆虞廡噲噲亦駿且龐爰陳羽奮爰
考笙鏞宿燎設簋鼂鼓逢逢以雅以南罔不奏公
維新廟貌億祀以隆肅清將事有恪而恭言告師
氏穹碑樹鴻小子獻頌敬拜下風

東莞盧上銘謹頌